

四庫全書

集部

欽定四庫全書

宋元詩會卷八十七

兵部主事陳焯編

傅若金

字與礪任廣州教授順帝元統三年出使安南其  
宿天使館二詩最傳於世有玉樓集若金妻孫惠  
蘭亦能詩早  
卒見閨閣中

歌風臺

黔首厭秦暴龍德奮炎劉英雄乘天誅拔劍起相仇天

風墮陵谷飛雲揚九州天下事既定懷土未遑休置酒  
宴高臺中厨進庶羞悲歌落林木父老皆涕流功臣日  
殖醢壯士復何求至今豐沛間長顧使人愁故鄉帝所  
愛零落遺舊丘大運各有終賢聖誰能留焉知萬歲後  
魂魄復來遊

題宜春鍾清卿清露軒

秋氣集太虛夕光團高樹時聞陰液墮暗識商飈度旄  
旄星動林英英月霏霧涼局息塵想幽琴寄玄悟寂歷

松上聲逍遙丘中趣釣天澹斜景銀河曖微素古調今  
所稀大音誰能喻仙人飲沆瀣壽命金石固千歲不可  
期空歌徒延慕

少年行

長衢若平川輕車馳流波上有都人子明肌艷朝霞芳  
塵揚遠風白日耀舞羅少年輕薄兒調笑相經過狎坐  
酌美酒日暮酣且歌千金罄一笑豪右馬能加時俗誇  
朱顏美女悅春華春華豈不好遲暮當如何

雜詩 四首

植蘭彌九畹踴菊被三徑幽芳乃殊姿馨德良可並  
蘭以為美餐菊以資命賸言理蕪穢恒使枝葉淨蕪穢  
苦易侵枝葉苦不盛豈無桃與李貴此諧野性

間夜坐中庭素月流我懷鳴琴發遠思俗音難與諧  
微颺經前楹徐響正裴回欲歌南風曲聽者良以希  
願言薦清廟復感鳳來儀

異人言種石可以致雙璧千金受玄秘辛苦乃有獲溫

其比君子韞積良愛惜青蠅易為汙恒恐傷厥德連城  
不願售思以置君側終歲無與言持之將安適

皎皎素明月娟娟含令姿浮雲遽起滅圓影遂叅差山  
川莽回互天地亦相疑焉知冥昧中明潔終不移弦望  
有恒運清光寧久虧

題淵明漉酒圖

淵明性嗜飲所遇適其真漉酒東籬下邈若旁無人捐  
綬非所吝焉愛頭上巾田園日成趣松竹相與親百年

何為爾酩酊及茲辰陶然至和內混沌以為鄰

羣雁圖

微茫洞庭野隱約瀟湘岬鴻雁將栖息飛鳴求其伴先  
集良未安後至淒欲斷使我懷弟兄因之中腸亂留連  
江海遠慘淡秋暉晏常恐隨天風高飛入雲漢

題墨梅

老樹亞晴空疎花帶寒野風流不自惜澹泊從人寫歲  
晏孰相娛空山少來者

題衛知事廣衍倉西軒墨竹歌

吾聞渭川竹如簣太倉欲致那可得開眼睛烟落戶牖  
透裳冰雪在胸臆愛之借問作者誰母乃與竹同標格  
自是君懷足清致故須好事留真迹陰森雨氣發中林  
颯爽秋聲赴前席微坡直具百畝意老榦真憑萬鈞力  
玄豹猶含隱霧章蒼龍已奮干霄翼火雲六月思遠避  
安得坐我林間石待實誰憐彩鳳饑釣鰲未試長竿直  
為君歌罷久嘆息羣玉蕭蕭動高壁



邯鄲行

邯鄲城頭下白日邯鄲市上風  
蕭瑟故壘空餘鳥雀悲  
荒垣只見狐狸出何主墳墓對山阿  
尚憶諸侯爭戰多  
趙客歸來重毛遂秦軍老去畏廉頗  
黃塵白草宮前道  
鬼火如燈夜相照公子秋來不見歌  
美人月下那聞笑  
當時冠蓋激浮雲  
撾鐘考鼓宴青春  
只今惟有郵亭樹  
還送年年行路人

八十里山行

桂林之區猺賊雜處南有八十里之高山絕天綿延開  
險阻賊人倚之作巢砦劫掠經年勢還大官軍收捕費  
供給主將遂巡竟何待居民近山晝夜愁四下行人皆  
白頭况聞良家半為賊官府貪橫仍誅求安得大聚邊  
頭兵甲鑄田器盡鋤高山作平地高山平猺賊斃

銅爵硯歌

鄴中文磚天下奇流傳為硯亦堪悲月砌寒傾古臺暮  
雨犁耕出斷釵時荒涼火燒狐兔窟金棺別葬奸雄骨

石麟暗刻魏春秋銅爵空題漢年月可憐此硯依浮世  
曾見高筵美人醉行迹猶沾舊襪塵啼痕已滅新妝淚  
向來登踐日紛紛即今磨洗見奇文題詩為弔西陵樹  
幾片殘霞入雁羣

牧牛去題袁慶遠經歷所藏畫

牧牛去千山復萬山上山日出愁起晚下山日入苦行  
難手中鴈鴒牛伴侶養來多日能人語縱牛不牽繩自  
垂聽他行食毋苦之欲歸尚憂牛不飽更近前溪多水

草但願年年牛盡肥主翁足食身足衣農家養牛國所  
賴惡少城中殺牛賣

送楊元成奉旨之徽州過家錢塘

綠槐五月高雲冷行人辭闕歸鄉井奎壁秋迴帝座深  
斗牛夜隔天河永君今銜命出江關却到新安幾日還  
天上應須朝絳節湖邊何得愛青山

江州社日阻風

社日長為客行人總念羣湓江春過雨廬阜晚生雲綠

酒洽歡飲清絃送別聞風檣未得動堅坐且論文

下邳懷留侯

豪傑關休運乾坤屬遠猷自須成漢業豈獨報韓仇黃  
石嗟長往青山感昔遊同時多草莽事定覓王侯

七夕

耿耿玉京夜迢迢銀漢流影斜烏鵲樹光隱鳳樓雲  
錦虛張月星房冷閉秋遙憐天帝子辛苦會牽牛

賦得天際舟送兵部張孟功治河

日下行人發春晨去鷁催纜侵斜月解帆向斷雲開愛  
鳥窺詩卷垂虹映酒盃尋源不可盡奉使幾時回

送金華王琴士還山

年少金華客囊琴暫出山忽聞春水滿徑逐暮雲還三  
洞飄玄鶴雙溪下白鷗應尋牧羊子時過綠蘿關

寄題余泰亨隱居

聞說幽棲處遙連郁水天徑開移竹地渠引灌花泉坐  
客留傾釀隣人訪草玄京華遠遊子那得共盤旋

別龍州蕭從事韶 二首

北極絲綸下南陲政化通靈槎浮度斗瘴州偃隨風殊  
俗難為別清談喜屢同馳驅不可住心切大明宮  
使節明金虎腰弓偃畫蛇蠻方趨號令原隰見光華邊  
樹猶含綠江梅久放花憶君依幕府何日定還家

梧州嘉魚亭

舟楫回沙驛旌旗駐郡亭江通五管白天落九疑青此  
日瞻雲氣誰家見客星軍需晝夜急寇盜幾時寧

別靜江文學諸公

乍見先愁去將行未忍分字期歸後寄歌畏別時聞驛  
樹過春雨江船隔夜雲馳驅念吾弟羽翼待諸君

金陵晚眺

金陵古形勝晚望思迢迢白日餘孤塔青山見六朝燕  
迷花底巷鴉散柳陰橋城下秦淮水年年自落潮

京師守歲

日月催時序乾坤隔晦明殘年萬里夢今夕幾人情久



客煩朋友雙親倚弟兄深慚須薄祿不得謝浮名

韓淮陰廟

淮陰千古英雄恨楚樹荒荒夕照殘水夾廢城春草合  
雲昏迷廟野花寒封齊安用真王印興漢空遺大將壇  
高帝旌旗俱寂寞斷碑零落後人看

送唐子華赴嘉興

聞君秋思滿南湖行李今晨發帝都幙府初乘從事馬  
江城還憶步兵鱸樹浮白日山侵越潮蹴青天海入吳

閒暇憑高動詩興須成一醉掃新圖

和危山曜寄弟

故園兄弟總相思久客懷歸屢失期  
司馬却慚題柱早東方翻恨上書遲  
都門柳暗愁中見鄉國花殘別後知  
昨日南橋放春水望雲回首獨多時

題畫船入蜀圖送夔州教黃尚質

楚客之官泛蜀船畫圖盈尺見山川  
九江樹色瀟湘外三峽猿聲滯瀕前  
方譯漸通巴俗語國書新得漢人傳

豈無好事能攜酒問字時時集講筵

王氏相師山莊

相師之山雲杳冥千巖萬壑倚空青上方雷雨藏天井  
南極風烟落洞庭溪客去迷花藹藹野人居愛竹泠泠  
何時遂買登山屐乘興還來扣石扃

過故妻墓

湘皋烟草綠紛紛洒淚東風憶細君每恨嫦娥工八月  
虛疑神女解為雲花陰午坐閒金剪竹裏春愁冷翠裙

留得舊時殘錦在傷心不忍讀回文

按若金妻孫氏患  
蘭性慧過人工五

言近體年二十三歸傳五月而卒  
寓賓湘中其詩二首見香奩集

### 汴梁

汴上荒城繞故宮山頭危石墮秋風  
夾門市起聞嘶馬  
梁苑樵歸見斷鴻  
鬬草尚餘殘後碧  
進花無復盛時紅  
欲登高處腸先斷  
滿目閒愁賦未工

### 送姚子微

雙闕除書下玉階  
三湘回櫂拂冰崖  
天垂銅柱南低海

城入金陵北近淮江國雁來秋肅肅驛樓雞動曉喈喈  
大家定有東征賦鮭菜隨船慰老懷

送盧茂實之廣東憲幕

仙城近接衆山迴憲府遙臨百粵開海上喜通持節使  
幕中兼得濟時才蛟宮織罷魚龍出蜃戶珠還蚌蛤來  
預想到官多暇日清詩題徧嶺頭梅

徐州

斷山數里見浮屠水樹微茫映日疎舟楫徧經危石過

人烟稍近白雲居  
朱陳縣遠思遺俗  
楚漢臺荒想故墟  
萬古風帆自來往  
新詩吟罷獨躊躇

雪中次元茂才

北闕今晨雪滿墀  
腐儒憂國畏人知  
月寒弱水迷三島  
雲暗蒼梧失九疑  
瑞木細飄天上葉  
梅花潛發嶺南枝  
山陰那得乘佳興  
起遶前軒自詠詩

出郭

晴光縹緲汎青春  
遠色氤氳動紫塵  
出郭自因芳意早

尋溪兼得野情新  
花邊古寺翔金爵  
樹底高墳臥石麟  
却倚層丘望城闕  
上方雲氣繞龍鱗

寄河間趙運使

雪盡官河春水生  
移家還出鳳凰城  
竹間退食占靈鵲  
花外題詩聽蚤鶯  
益井青烟晨縹緲  
漕溝素月夜分明  
京華久客遙相憶  
欲託音書不稱情

候友人不至戲作

儀真城下菖蒲節  
晴日江頭錦繡文  
旗影送船侵樹過

笛聲催鼓隔花聞  
雙龍鏡化閒風雨  
五馬歌沈暗水雲  
日暮故人期未至  
誰家看舞石榴裙

送趙仲禮御史兼呈王侍郎

二首

建業城頭烏亂啼  
知君感古夜聞雞  
淮揚貢賦元趨冀  
晉宋文章漸入齊  
草疏或依松影坐  
哦詩應就竹陰題  
書來肯憶京華客  
日日長衢聽馬嘶

賜書南粵初歸日  
駐楫秦淮欲暮天  
嘯詠偶經梁舊寺  
登臨猶憶晉諸賢  
謝安別墅蟲鳴裏  
王導新亭鳥去前



多謝府中賢侍御別時能作送行篇

荅何如禮

鳳凰城中花若烟客遊多是感流年春生江漢思南國  
雪盡幽并見北邊遠使豈貪歸有橐微官仍苦坐無羶  
相逢未恨今晨別滿把驪珠慰目前

同孔學敏遊仙遊觀

鳳音亭下草如熏誰見仙娥倚翠裙環珮忽疑遊處得  
笙簫猶想去時聞湘江竹暗連春雨衡岳花開隔暮雲

千古遊人自來往登高回首思紛紛

寄方君恕

聞君臥疾近如何閉戶時應賦短歌安石或能攜妓出  
子猷常擬櫂船過微風倚檻宜脩竹落日臨池愛綠荷  
也念湖邊未歸客秋山回首白雲多

送湘中李從事赴郴幕

長沙上游山水窟郴陽自古說名邦天圍翠岳連三楚  
地合清湘赴九江歸去收書經石室坐來拄版對雲窻

西風慘淡都門別莫愛青樓倒玉缸

過興安縣

亂峰如劍不知名篁竹蕭蕭送驛程  
轉粟未休灘水役負戈猶發夜郎兵  
百蠻日落朱旗暗五嶺風來畫角清  
空使腐儒多感慨西南羣盜幾時平

題安南天使館

元統三年頒正朔詔書還到極南開  
使旌入館青雲動仙蓋臨江白日迴  
諭蜀宣勞司馬檄朝周終見越裳來

北歸耆舊仍相問文化如今徧九垓

却侍姬

夜宿安南天使館主人供帳爛相輝寶香烟起風過席  
銀燭花偏月照幃王母謾勞青鳥至文簫先放綵鸞歸  
書生自是心如鐵莫遣行雲亂濕衣

陳高

字子上平陽人官淮陽值亂離多  
感時思鄉之句其詩集名存藁

南有山思友生也

南有山高維虛矣其上伊石不可以輿兮念子之遠莫  
我愉兮南有水清維流矣其泮伊陸不可以舟兮念子  
之遠莫我儔兮

漢水贈別也

瞻彼漢水其流潺湲之子于邁言采其蘭嚶嚶好鳥集  
于林間娟娟美人可以晤言我思美人在漢之涘秉心  
允臧威儀楚楚聿求厥德將子是與慎爾優游成爾譽  
處南山有玉瑑以為琚北山有梓規以為輿君子好修

始終弗渝

發嵎縣

行役苦晝熱戒程當夜闌睡覺呼僕夫出門路漫漫明月照人影疎星掛樹間流螢點衣袂零露濕巾冠潮遠剡溪水俄入新昌山屬茲干戈際愈覺行路難愧無經世資何以濟時艱悒悒抱遠思綿綿起憂端東方忽已白林鳥鳴間關前瞻石嶺峻喟然發長嘆

容春軒

層軒結構幽當窻時花木簷雲樓夕陰庭鳥鳴晨旭四  
時景物佳早晚風氣淑主人頗解事灑掃置書軸攜琴  
來佳賓開樽瀉醴醕微酣有餘歡諧笑春意足寧知城  
南居秋風滿茅屋

對菊分韻得須字

佳菊性所愛金英霜後數見之開旅懷移植向庭隅豈  
無杯中物幽賞與誰俱今晨好友過花下共歡娛西舍  
新醪熟足以供所須

惜別分韻得與字

江山無行人天寒况風雨出門辭友生情深別良苦  
寒衣感繾綣豈不念留處高堂想歸期歲月不我與  
停舟且勿迫傾樽出清醑酒短意更長含淒我無語

泊館頭步

朝發芳林嶺夜依館頭泊厭茲跋涉勞懷哉田園樂  
生理苦艱難歸耕歎悠邈貧窶何足憂甘旨焉所託  
栖栖道路中素心負丘壑行年三十餘齒牙半搖落  
良由筋



骨疲豈但質衰弱憂思耿不寐起觀衆星白羣雞鳴江  
皋已復戒行客

晚歸

西崦日初沒遠樹生夕陰晚步草露濕獨歸松徑深入  
室載言笑稚子牽衣襟樽中有濁醪可以酌復斟坐來  
窻牖白佳月出東林幽情寄觴詠適意忘華簪自得閒  
居理寧憂外患侵

同蔣伯威朱德常遊育王山得冷字

春晴烟霧開地勝林泉迴杖策隨諸彥尋僧訪幽景古  
逕人影稀落日松陰冷徜徉谷鳥散臨憩山房靜玄賞  
誰能忘塵慮從茲屏

### 山居

避喧林下居抱病山中臥家貧酒屢空性懶詩慵課禽  
聲隔樹啼雲影當窻過獨有采樵人時來慰衰惰

### 晚步

雨霽野色淨杖策步殘陽度橋尋幽徑沿溪逸西莊隴

麥生微秀籬菊散清香行吟來復往零露勿沾裳

落梅曲

梅花開滿枝無奈曉風吹風吹花落盡爭似未開時花  
開終有落非關曉風惡愁殺愛花人城頭復吹角

題山居圖

層巒積翠色中有嘉樹林幽人此避世結屋山之陰攜  
琴上山去獨懷千古心知音不可見歸路白雲深

懷友

作客黃山下思君漢水濱  
愁牽清夜夢吟瘦老夫身  
漂泊誰知我交遊獨此人  
春來尋小艇江上問通津

寒食寓興次黃宗魯

二首

浩蕩乾坤大羈棲歲月深  
他鄉對寒食愁思滿淮陰  
詩句慚孤詠春花孰共尋  
相逢同郡子時復一論心

去歲清明節天台看杏花  
淒涼今日事漂泊野人家  
淮楚風塵暗鄉山道路賒  
倚門親白髮反哺愧林鴉

獨客

獨客悲秋夜高秋託異鄉月侵窻影白風度角聲長野  
戰生新鬼邊烽照近疆歸耕吾計決不必問行藏

贈章以元昆仲

相見談經史江樓坐夜闌風聲吹屋響燈影照人寒俗  
薄交遊盡時危出處難衰年逢二妙亦得悶懷寬

送胡希元歸江西

落日烏紗帽西風白布裘吏才兼翰墨羈旅亦風流聽  
雨留僧寺看雲憶故丘他鄉同泛梗那忍送歸舟

四月十六寓玉環喜家童來住至

數月思家信今朝喜汝來妻兒憐我遠懷抱向誰開山  
谷多烽燧田園半草萊大軍消息近故里尚堪回

病中遣懷

臥病玄冬半羈栖碧海邊風塵方滿野戎馬已經年下  
邑供軍食何時發漕船薄才無寸補自合賦歸田  
久臥思登眺扶衰謾倚樓山紅斜日映江白晚烟浮行  
直書空雁帆敲入浦舟病身慚食祿長羨五湖遊

懶拙

懶拙從人棄行藏與世違陶潛辭米去張翰憶蓴歸垂  
釣貪春水看花愛夕暉便須開竹逕還製芡荷衣

入山

入山驚道險山嶺覺天低日礙危峰過雲依翠壁棲幽  
花如血染怪鳥學兒啼避世須來此桃源路已迷

過李家坑

鳥道高千丈雲山入萬重汗流愁赤日力倦倚青松羣

僕頻相失行人竟不逢  
田家何處有僧寺隔前峰

遊雅山寺

上方殊勝地長者給孤園  
挂壁袈裟靜生階秀草繁  
樓光凝晚照樹色映前村  
法食干戈際真知象教尊

送別

平生幾兩役丘壑每窮探  
訪鶴青田曲穿雲雁蕩南  
老成羣輩服姓氏衆人談  
相見復相別題詩興不堪

橋上



落日清溪上涼風梓樹秋  
北來船竟泊南去水空流  
宇宙終無極干戈未肯休  
野人無意緒獨立數歸鷗

元日

元日風兼雨蕭條野外村  
過門車轍遠記節酒杯存  
戰伐看今歲棲遲且故園  
兵戈如未息身世豈須論

重登近山樓

羈旅歸來日危樓得再登山  
如前歲好雲向小窻凝種  
木看今長歲書比舊增題詩  
成感慨老我愧何能

題中峰樓

中峰之樓風景幽山花滿屋翠雲流海天日出蓬萊近  
月夜烟清沈瀟浮溪上松陰歸晚鶴簷前花樹語春鳩  
齊川渺渺黃塵裏此日登臨是勝遊

獨望

獨望東南日向脯風高雪盡雁行孤青山天際連於越  
白水秋來滿太湖海內干戈猶爛熳舍西園圃近荒蕪  
文章未必能經世深愧飄蓬歲月徂

自明回溫留寓郡城不得遂歸田之願述懷有作  
西風落葉送清秋力疾凭欄寄遠愁正慕陶潛歸栗里  
翻為王粲客荊州山峯近郭東西起江水通潮日夜流  
景物年年只依舊獨憐華髮鬢邊稠

客南塘作

江頭無計問歸舟抱病羈栖古寺幽風雨鶯花成寂寞  
干戈詩酒廢賡酬衰年白日愁邊度故國青山夢裏遊  
見說王師向淮甸早須傳檄定南州

題花竹翎毛

棠梨三月吐花齊  
布穀飛來樹上啼  
想見小園微雨過  
春光都在石欄西

子昂畫

風動秋山日已晡  
舊時林苑盡荒蕪  
王孫去國猶無恙  
解寫江南烟樹圖

盧溝曉月圖

盧溝橋西車馬多  
山頭白日照清波  
氈廬亦有江南婦

愁聽金人出塞歌

岑安卿

字靜能平陽人與李五峯  
孝光同時其詩為栲栳集

偶讀戴帥初先生壽陳太博詩二首依韻感賦

貪夫富且壽吉人饑復寒  
什襲寶燕石白壁泥塗間  
老成愧苟得童孺羞無官  
如何羊裘翁不念歸來難

謗讟我自致勿怨生不辰  
疾藜非所據石卜陷厥身  
始知膠漆心千載雷與陳  
蠅矢任黑白頽然自天真

百雁圖

雖雖鴻雁羣渺渺水雲國白雪剡川藤玄香牧溪迹形  
真具生意彷彿二百翼四海兄弟情於茲見叙秩前鳴  
後如應高下低復逆隨陽足稻梁直夜防機弋水寒蘆  
葉黃霜清葦花白羣遊得所止一氣同悅懌哀哉淮南  
謠布粟歌斗尺東阿賦豆其才高終擯斥觀圖適念此  
翻為古人戚今人猶古人毋為後人惜

食新筍

黃蘗甕已竭枯鱸筐亦空老芥長芒刺食久咽為痛山  
雨折竹胎未入春盤供畦丁適踵門致我親戚送脫綳  
錦紋散切玉霜刀弄新香歆湯鼎饒涎迸齒縫未倩撻  
詩腸已破食肉夢參禪誠滑稽煮簣宜突閔贊寧譜亦  
佳涪翁句堪誦僻居東海偏斯味時一中山僧應厭餐  
飽食聽春吟

和濟天岸法師約李五峯同遊韻

我不識往古誰復知來今彼哉牛山淚祇濕當時襟節

序倏代謝秋風生樹林暑氣日已薄涼氣日已深酌我  
新熟酒鳴我素蓄琴陶然一今古萬事從無心

和李宰韻

春風吹繁花秋露淨孤月壯年嗜好新對此每傾悅年  
來百念灰搔首惟短髮流光不我與苔生古人骨常懷  
却世紛宴坐學龜息從渠鵬去留不問馬得失李侯宦  
遊蹤來僦海上宅庭蘭茁春芽笑語落霏雪詩文嘗我  
過老晦資啟發窮思獨善身自獻殊未屑對酒還當歌



甘旨共朝夕君心與我懷相對交歎息

寄興示諸子

田園日蕪穢哀邁不自治童僕肆踈懶子孫習娛嬉良  
苗雜稂莠瓜瓞纏蒺藜草深狐兔聚水積蛙蚓滋念茲  
每獨往邈焉起遐思世事亦如此重令我心悲

咏范氏池亭

虛亭巧結構有此觀魚境碧沼風生紋高林月留影花  
竹列我前松杉瘦而穎山環翡翠屏水瑩琉璃井書生

東海來山水頗深省喜有鄭家湖詩文每相警

題太真春睡圖

東風吹香蕩晴晝長安宮苑花如繡海棠一夜折輕紅  
淑氣薰蒸困醇酎太真徙倚沈香亭宿醒未解春冥冥  
眉峰歛翠翳秋水侍兒夾擁花娉婷玉牀膩滑芙蓉展  
水沈烟裊金屏煖丹腮融潤珊瑚溫寶釵斜簪烏雲綰  
上皇玉笛那敢吹地衣紅皺靴輕移傳令別殿罷歌管  
流鶯不語游絲垂漁陽鞀鼓邊塵動臺閣無言卿士惜

婦人一睡四海昏主闇臣諛總如夢翠華西狩九廟隳  
禍胎未剪三軍疑馬嵬夢醒生死訣一時悔禍人心歸  
驪山舉燧供歡笑戎馬蹴踏周原草丹青誰寫春睡圖  
後世不須箴大寶

和王子英醉後歌

至人超六合造物期同遊飄飄無根蓬蕩蕩不繫舟江  
河固知返日夕唯東流鳴鳩爾何為戶牖思綢繆人生  
底用愁如織朝看朱顏暮無色何如生死兩忘懷日月

拔飛任交擲君不見秦皇入海求方瞳包括區宇摧羣  
雄沙丘輜輶鮑魚臭一世萬世今何功又不見班生投  
筆踰流沙封侯萬里威遠加玉關東望不可入上書祈  
請心咨嗟我生於人何所為死當身外亦誰悲鳥鳶螻  
蟻苦分別珠襦玉柙徒光輝不如生前賦詩飲酒放浪  
山水間死與造物默默還同歸

姑蘇臺

吳宮築土山為趾俯視水雲三百里臺中歌舞萃華麗

金碧巒岼眩珠翠江花泛泛浮鷗夷會稽思霸甘卑辭  
千金不買西子笑一舸能逐陶朱歸丹砌草深麋鹿臥  
淒淒棘露沾人衣闔廬丘墓虎為衛至今鐘磬聞餘悲  
遊人不悟國傾亡松間援筆題真娘

朝陽臺

巫峯十二青參差石形儼現仙娥姿蒼藤翠木怯淒冷  
精誠夜感襄王思仙衣縹緲仙裙濕雲影飄飄雨聲急  
陽臺朝暮不勝情高唐想像愁無極夢中奇遇事杳冥

公子雕詞亦胸臆荒涼古廟屹江干臺空不見行雲跡  
遊人悵望尚徘徊古碑寂寞荒莓苔

戲馬臺

彭城負劍河為障南屹崇臺勢雄壯重瞳奮跡入秦回  
諸侯攬轡皆東向酒酣蹙馬升崔嵬鬣翻鬣振雲烟開  
倚鞭四顧示無敵指揮貌虎心雄哉黃金間行亞父去  
帳下茫然失謀主楚歌聲合潰重圍昔日名雕空故步  
千年積恨氣未消繞臺泗水撞飛濤

望思臺

金莖擎露空崔嵬湖臺築恨心猶哀  
剖桐殞土事曖昧禍機元自長生來  
壽踰大耋世已稀越國憮人心險巖  
盜兵誅佞兩非是屈釐督戰猶驚疑  
銜冤竟隕鳩泉里壺闕三老言非遲  
向無少卿護病已上林僵柳何緣起  
空餘老淚滴紋甃斑斑相間苔花紫

逢秋

高梧脫葉金井寒壁月夜挂朱闌  
干銀河萬里浸虛白

凌風欲訪乘槎仙，金壺箭水聲第一。畫角梅花聽悽惻。  
三山樓閣碧海涼，老鶴不眠清露滴。

謝季仲容見贈

海風立水天空濛，瘴雲晝掩蓬萊宮。仙人跨鶴天姥東，  
歸來樓閣昏無蹤。九仙山高玉為戶，廣寒夜訪乘鸞女。  
桂香滴露夢不成，看徹霓裳羽衣舞。宮袍舞錦花翩翩，  
詩成毛骨生清寒。飛章贈我歸剡川，推蓬月在梅花邊。

次王敬助見寄韻

二首



琴書曾遠訪訪我海東濱對酒不成醉看花惟惜春青  
燈書有味白眼世無人儘有耕桑趣翛然一幸民  
祕圖留滯日鄉思已淒淒黃卷挑燈閱紅妝掩鏡啼交  
新情僂俛感舊恨低迷語及深知處應憐獨鶴棲

九月三日晚與鄭元秉對坐至日暮小雨後歸宿

偶成

歸人歸未得天際復生陰小雨濕官道清砧傷客心蕭  
肥蘭蕙瘦雀語鳳鸞瘖坐對滎陽老空懷正始音

和來竺西見寄

歲暮重峰寺詩文喜共論  
暝雲昏疊嶂寒雨滯孤村  
別後病翻劇書來身幸存  
藤枝肯扶老終扣月中門

寄易禮弟

越客半年住閩溪  
千里遊山高不礙  
夢日暮易為愁  
兄弟終相憶鄉閭非所憂  
何當先隴側同理釣漁舟

送易直縣尹兄赴松溪

武夷山水最清佳  
路轉三衢未覺賒  
百里絃歌初作宰

一官琴鶴早辭家  
夜涼燈影連書屋  
溪近松聲雜吏衙  
遙想政成閒暇日  
錦牋試墨品春茶

次鄭元秉陪劉同知謁子陵祠韻

畫舫秋江集縉紳  
公餘來弔故人魂  
子陵名節千年墓  
丈叔雲仍百世孫  
高閣清風生玉麈  
空山涼月墮金尊  
獨慙老朽無由到  
只有新詩可共論

遊東山寺贈蔚東岡

東山景物吾州稀  
蓮宮璀璨浮春輝  
過湖人騎白雲馬

待客僧立青苔磯花邊舉杯酒一斗石上解衣松十圍  
最愛東岡老禪伯夜窻為我話禪機

遣興

去年不死今年活直語半生人不禁老去謗書從滿篋  
春來樂事總關心觀魚濯足滄浪水聽鳥支筇楊柳陰  
我已無心叫閭闔玉皇高拱紫雲深

重峯寺祈雨後東李元善


塵尾高揮演大乘火雲不散愈峻嶒謾同三島吟詩客

閒訪重峰醉酒僧翠竹陰移涼夢遠碧蓮香散暮雲凝  
歸途未即添瓢注猶有長風解鬱蒸

送杜洲殷山長歸天台

殷肇土茫茫詩歌玄鳥祥建邦思得姓易代復賓王德  
澤流千古雲仍徧四方深源還輔晉鄖國亦興唐奕奕  
家聲遠綿綿世胄長天台存舊譜地望著清光教育文  
詞贍漸摩道義彰移官杜洲曲開講林山傍曉日舉比  
煖薰風絳帳涼青衿諸俊彥綵服兩兒郎弟子堪懷栢

先生實棟梁羣飛迷蒨鬱駿足識康莊歲月圖書滿風  
雲際會良伏龍終偃蹇鳴鶴自翱翔執友陳共帳攜家  
上小航錦囊詩匱匣蒼玉佩鏗鏘壯志期高翥歸心馳  
故鄉赤城霞粲粲秀嶺日蒼蒼巾子峰頭月瓊臺石上  
霜暫伸懷土樂爰整好遊裝下捧薇垣檄遙沾楓陛香  
公車應薦剡耆德動交章不日看除目何時舉賀觴佳  
音如我寄魚雁在滄浪



宋元詩會卷八十七

欽定四庫全書

集部

宋元詩會卷八十八

詳校官中書臣陸湘

主事銜臣徐以坤覆勘

總校官知縣臣繆琪

校對官中書臣王鍾泰

謄錄監生臣陳秉寧



欽定四庫全書

宋元詩會卷八十八

兵部主事陳焯編

張翥

字仲舉晉寧人翥少時負其才雋豪放不羈好音  
樂喜蹴鞠不問家業其父憂之翥一旦翻然改曰  
大人勿憂今請易業矣乃謝客閉戶讀書晝夜不  
輟遂以詩文知名一時至正初用薦者召為國子  
助教分教上都生尋退居淮南會修遼金宋三史  
起為國史院編修官書成歷應奉修撰遷太常博  
士禮儀院判官再入翰林為直學士侍講學士乃  
以侍讀兼祭酒除集賢學士授階榮祿大夫翰林

承旨致仕給全俸終其身卒年八十二翁長于詩其文不逮詩而每以文自負常語人曰吾于文已化矣他日翰林學士實喇卜示以所為文求改易數句翁苦思良久終不就實喇卜曰先生于文豈猶未化耶何思之苦也因相視大笑平生詩文最多遭世亂散亡所存律詩樂府僅三卷

送黃中玉之慶元番舶

昔我遊四明壯觀溟海波褰裳空山頂曙色寒嵯峨月輪鎔生金涌出萬丈渦雲氣忽破碎朱光相盪摩決皆蓬萊宮攜手扶桑柯羣仙迎我笑佩羽紛傚傚颼風歛驚潮騰擲鱷與鼉浮槎徑可擘從此超天河精神洞百

靈上下煩撓訶歸來已十載遠夢時一過君家賢父兄  
儒術傳世科薄言捧省檄舶署聊婆婆是邦控島夷走  
集聚商舸珠香雜犀象稅入何其多權衡較低昂心計  
寧有訛資閱須歷試壯圖詎蹉跎維君官事隙為訪岳  
之阿縣應仙者徒往往嘯且歌遐征渺不見空響遙相  
和

題陳孝傳後

昌化陳南仲幼失其生母王氏尋之六年後得之永

豐縣

百丈山前妾辭主禮賢鎮中子逢母三十餘年一日同  
白髮相看淚如雨阿嬈去時未斷乳兒壯但知心獨苦  
清湖老嫗天所留逆旅主人神使語歸來桑竹溪之澍  
婦前持觴孫起舞雙瓜生祥表秋圃豈待旌書動官府  
吳人買妾紛莫數歲滿母歸遺子女巷南巷北不相覓  
况復山川兩脩阻嗚呼千秋復萬古孝子之名在寰宇  
世上滔滔忘母人不愧唐昌一坏土

螢苑曲

楊花吹春一千里獸艦如雲錦帆起咸洛山河真帝都  
君王自愛揚州死軍裝小隊皆美人畫龍韉汗金麒麟  
香風搖蕩夜遊處二十四橋珠翠塵騎行不用燒紅燭  
萬點飛螢炫川谷金釵歌度苑中來寶帳香迷樓上宿  
醉魂貪作花月荒肯信戟劍生宮牆爛斑六合洗秋露  
尚疑怨血凝晶光至今落日行人路鬼火狐鳴隔煙樹  
腐草無情亦有情年年為照雷塘墓

重賦明山歌送胥式有儀還武昌

式從其師曾堅  
子白讀書明山

盱母城南隱居者一生耕鑿盱南野何年移入明山來  
築樓山顛雲在下環山小塢三十六中有清池蔭桑竹  
日高塢口煙霧稍稍見行人出深谷池頭古井穿石空  
絕底暗與江流通井中鯉魚長尺半人不敢取疑蛟龍  
隱居何人曾子白誰其從者胥生式先生喜與山為徒  
意不在仙在樓居胥也來讀山中書清泉煮酒不用酤  
興酣題詩滿青壁墨痕入石青模糊萼蓋浮丘石門麻

姑鄰峰丘壑可遊衍山中之樂適吾軀生今掉頭不肯  
住京塵茫茫歲云莫豈知印亦愛山人未辦山貲得歸  
去曾先生幾時把袂明山行灑掃樓上聽松聲黃精飽  
啖一千日飛上丹梯朝玉京

息齋竹石古木為會稽韓季博士題

上有歐陽  
原功書

老竹葉稀多禿枝新竹碧潤含幽姿籜中龍子振春蟄  
突出雷雨頭叅差傍躡怪石石罅裂裂處恍惚疑龍穴  
山中有樹皆十圍活幹撐青死槎折霜皮食盡乾蘚文

半頂斬立雙極分最後一株身出羣垂枝倒走陰崖雲  
李侯標致不可得小字親題別塗黑縱橫不在摩詰下  
蕭爽直與洋州敵玉堂學士欣見之濃墨大書真崛奇  
森然一片鐵石筆妙甚七字瓊瑰詞此詩此畫今兩絕  
把玩微風動毛髮只應真宰泣凋鏤一夜山窓冷秋月

伍牧

宋將尹玉援常  
州戰死于此

苦戰勤王事精魂泣鬼雄壞城兵氣黑遺鏃血花紅故  
老談亡國明時錄死忠長吟一搔首落日鳥呼風



題楊太史山居圖

湖上山居好，奎題壓翠微。  
煙霞改舊色，林壑發清暉。  
松晚看書罷，荷涼坐釣歸。  
圖中有真趣，須此挂朝衣。

陪東泉學士汎湖

山靄忽空無，春暉正滿湖。  
船頭載家樂，花裏駐行廚。  
樂任喧呼動，歸從酩酊扶。  
使君留客意，更為倒金壺。

登金山吞海亭了公請賦

危亭突兀戴鰲頭，俯視滄溟一  
勺浮。龍伯衣冠藏下府，

梵王臺殿起中流扶桑夜色三山日灩澦江聲萬里秋  
老我惜無吞海句但磨崖石記曾遊

寄成居竹隱君

青袍朝士困京華此老蕭閒竹滿家山壓窮愁詩強項  
海枯渴肺酒槎牙商巖未採芝如草彭澤將歸菊有花  
孤負江頭理漁事短篷春雨夢溫沙

題唐子華畫王師魯尚書石田山房

秋水橋邊紅葉林數家茅屋傍青岑岡頭種玉朝煙暖

隴上鋤雲宿雨深  
摩詰輞川宜入畫  
少陵韋曲自成吟  
東嶺新歲晚來同  
煮應許山中道士尋

賦中書左曹小瀛洲

東曹地迥集名郎  
宛是仙家紫翠房  
閭闔上通天咫尺  
蓬萊移出海中央  
金波日暖浮鵷鵲  
玉樹春濃下鳳凰  
幾度夢回清夜直  
此身如在五雲鄉

登六和塔

江上浮圖快一登  
望中煙岬是西興  
日生滄海橫流外

人立青冥最上層  
潮落遠沙羣  
下雁樹敲高壁獨巢鷹  
百年等是豪華盡  
怕聽興亡嬾問僧

三月望日遊虎丘寺題小吳軒

海涌峯前雲樹盤  
佛宮飛閣出巔巘  
虎來古塚金精白  
龍卧秋池劍影寒  
禪老說空留壞石  
鬼仙題雨下虛壇  
憑高不盡登臨興  
更借西山晚翠看

題述律存道元帥平師宗三州卷後

不用牙璋遠出師  
將軍憑軾定邊陲  
隸人爭歛金盤血

漢使高縣玉帳旗司馬文章傳太史武侯威略震南離  
只今老父蘭滄上擬刻寧蠻第一碑

次韻存道元帥師宗感時及陡遡山竦刀寨入貢  
詩因送歸闕戍

徼外頻驚羽檄飛將軍三起著戎衣空山狐兔無藏穴  
平陸龍蛇有殺機已見趙佗知漢德更令孟獲識天威  
此行整頓蠻荒了箐雨瀘煙好賦歸

二月朔日登憫忠寺閣

百級危梯遡碧空憑闌浩浩納長風金銀宮闕諸天上  
錦繡山川一氣中事往前朝僧自老魂來滄海鬼猶雄  
只憐春色城南苑寂寞餘花發舊紅

奉答新仲銘禪師

吳楓初冷雁連天夢在江南野水邊詞客欲歸嗟老大  
美人不嫁惜嬋娟豺狼正爾當官道龍象於今護法筵  
我識新公老禪衲一燈蒲坐是真傳

題金陵

運盡黃旗晉祚開  
天星俄復圻三台  
方驚掘地雙鵝起  
即見浮江五馬來  
草暗離宮碑卧土  
雨殘戰地骨生苔  
當時一掬新亭淚  
誰信清談自有才

王繼學自海南召還翰林再除南臺侍御

天上歸來錦作袍  
幾陪春色醉宮桃  
銀河有路惟飛鵲  
碧海無山不戴鰲  
卿月又臨仙掌動  
客星偏傍釣臺高  
廣陵路接金陵近  
擬拂塵衣望節旄

吳江

坐倚風檣看太湖波濤瀕洞半三吳寒通上界咸池氣  
竊入中流水伯都雲暗蛟龍應起立雪深鴻雁自驚呼  
望亭有酒宵堪醉買得漁家一尺鱸

寄題杜原父懷友軒

尺五城南近世紛移家來並武夷君他年功業誰青史  
此日山林自白雲石氣曉侵書幌濕溪聲時雜櫂歌聞  
故人已有同棲約杖策行穿虎豹羣

贈馬易之



萬里征帆渡越江  
茲遊奇觀世無雙  
海中蓬島金銀闕  
天上玉堂雲霧窓  
吾道政須求柱石  
詩壇從此避旌幢  
青林白谷歸休地  
懷抱因君得暫降

中秋對月時張外史有約以醉不赴

明月中天雲霧消  
酒醒涼思正飄飄  
星河不動秋空濶  
鐘鼓無聲夜寂寥  
露下遠山皆落木  
風來滄海欲生潮  
仙家玩事無緣到  
虛負瑤樓聽玉簫

鳳山

衰草寒煙老木風南朝佳氣落秋空壁來山鬼遮秦使  
盤泣銅仙別漢宮壞埒尚傳祠乙鳥荒池曾見射飛鴻  
騷人自古多遐思長在登臨感慨中

水蟾為金齊賢賦

老蟾素魄稟金精千歲玻璃幻結成明水夜零陰燧凍  
丹書秋滿肉芝生腹凝寒露藏虛白影入銀河浴太清  
擬向嫦娥乞靈藥與君騎向廣庭行

題上清張道士壺洲

錦水東頭觀闕青仙家元不隔滄溟鳳麟洲渚寒凝碧  
雲霧衣冠夜降靈金醴浸花留客醉玉簫吹月使龍吟  
看君福地容蕭爽長與曾孫宴幔亭

見雁

雁行新自雁門來遠度平沙陣勢開光祿塞空霜氣冽  
受降城廢水聲哀烏孫公主歌誰和猿臂將軍射未回  
今日客中腸易斷不須更上最高臺

送式無外歸高麗

三韓山水有靈暉秀出斯人了佛機  
嶽寺禪餘留偈別  
王城齋罷戴經歸  
瓶收滄海降龍入  
錫度秋空近鶴飛  
只恐故林雲卧後  
一燈秋老木綿衣

送俞伯疇還浙東

四明遊客住京都  
旅舍青燈照影孤  
家信幾年黃耳犬  
鄉心一夜白頭烏  
却携長鋏辭金水  
直挂輕帆過鑑湖  
為問蠡吾王太守  
別來安穩有書無

鐵笛為孟天暉作

愛此輕圓鐵鑄成何須楚竹選孤生年多化作青蛇色  
夜靜吹如彩鳳聲繡出碧花凝錯落冷涵金氣發鏗清  
最宜携向君山去一聽仙翁奏月明

仇遠

一名仁遠字近仁杭州人張仲舉從之學詩

潮

一痕初見海門生頃刻長驅作怒聲萬馬突圍天鼓碎  
六鼇翻背雪山傾遠朝魏闕心猶壯直到嚴灘勢始平

寄語吳兒休踏浪天吳罔象正縱橫

梅

為怕緇塵著素衣凍痕封藥放香遲月來忽送欄干影  
春到不分南北枝喚夢翠禽依樹宿銷魂玉笛隔花吹  
從他萬片隨風去須有青青葉底時

卜居白龜池作

一琴一鶴小生涯陋巷深居幾歲華為愛西湖來卜隱  
却憐春堊又移家荒城雨滑難騎馬近市天明已賣花

阿母抱孫閒指點疎林盡處是栖霞

黃鎮成

字元鎮昭武人後至元間居金  
原山放情詩酒所著有秋聲集

道山亭晚憩

平池雨初晴日暮春水深殘霞墮空濶規月光已沈驚  
波躍潛魚過影窺翔禽芰荷綠參差嘉木縣清陰但起  
垂綸想遠生江海心小大固有殊放歌無古今

南田耕舍

離離南山田采采山下綠  
茲晨涼風發秋氣已可掬  
美人平生親零落在空谷  
顏色不可見何由踵高躅  
我耕南山田我結南山屋  
下山擷桑麻上山友麋鹿  
還肯過鄰家鄰家酒應熟

江仲謙恒德堂

江君世令族家在君山陽  
君山四千仞上有白玉牀  
雲氣出陰壑靈苗產陽岡  
仙人時往來石室留禁方  
江君往得之歸為恒德堂  
九轉空青砂沃以神樓湯  
散入刀



圭七冬炎夏清涼天闊一以合吾心乃夷康四海患瘰  
痺齊民生痾瘡國醫敢束手忍視同膏肓大山多靈藥  
食之可年長安得往從君吹笙住葯房

贈秋厓上人

開士黃金剝齋房白雲外尋師天台山柿葉寫經唄凌  
晨餐正陽玉屑和沆瀣飛錫到城市刀圭起沈瘵逃名  
師伯林隱顯謝流輩有時棲石室宴坐真空界行藥度  
幽澗秋雲溼霞佩我欲往從之高蹈塵宇隘他年嵩少

間揮麈一投芥

劉伯熙清溪圖

整脫塵鞅繫結此清溪居偶從農圃鄰時讀種樹書聽  
瀑掃松石眠雲依草廬韜琴自無絃直鉤不在魚未知  
穹壤間寵辱當何如

贈何萬里

瀧流繞郡山如戟黃茅峒深秋霧黑幽篁蔽空甍鬼嘯  
絕磧下水沙蟲射生猺持刀跣雙足出入如飛踐荆棘

官軍相持不敢殺年年出峒來為賊何侯挺身諭厥渠  
深入不用一卒驅椎牛醢酒拜縣令叱散部伍從降書  
君不見伏波將軍征五溪瘴雨溼衣歸櫂遲又不見令  
公單騎褫敵魄萬馬不嘶邊月白古來豪士立奇功何  
侯身老心力雄上尊襲衣拜賜畢歸釣白雲清渭中

李將軍歌

李將軍少年意氣輕浮雲青絲絡馬黃金勒寶劍錯鏤  
交龍文十二高樓連廣道千金結客大梁門昨日彎弓

連白羽射殺南山白額虎歸來饗士酒千鍾自向青樓  
按歌舞前年起兵從義旗斬將陷陣身如飛上功幕府  
久未報有酒不樂當何為

莫徭行

莫徭射生蠻峒谷窄袴短衣雙赤足前年應募作官軍  
惡少如雲學裝束千村一過如蝗落婦滿軍中金滿橐  
豸冠擊碎且勿嗔鄰寇不虞吾所託

分題送黃汝楫

冉冉孤生竹生在崑崙之嶰谷直節離離出地深寒梢  
蔚蔚叅天綠竹高不受霜雪侵願君同此歲寒心竹管  
可作簫韶聲願君吹作鳳凰鳴鳳凰鳴致時雍九奏方  
知孤竹功

春日山行雜興

二首

山郭晴光遠臨高逸興賒路經棲鶴地春入種桃家石  
頂尋雲母松根飲雪花故人留宿處朝飯有胡麻

山翁留客住自說樂餘年日養分男舍春耕稅主田雨

泥朝過鹿山木夜啼鵲雞黍煩相勞桃花出釣船

春雨南田書事 二首

流水三椽舍桑陰五畝田飯香分野碓茶熟候山泉石  
榻看雲坐谿窓聽雨眠桃花川上路應有釣魚船  
瓜圃通鄰巷柴門接野蹊賣薪歸早市行餉汲寒溪野  
鷺山前落林鶯雨外啼客來渾不答孤絕正幽棲

鉛山早行

早起辭林館鄰鷄已再鳴月弦當戶直斗柄插山高細

溼侵藜杖輕寒襲布袍前趨東日表五色動雲濤

三華吳宜甫桃谿雜詠

樓閣依山外高居白日長樹陰浮石潤雲影入江涼宴  
坐涵千古遐觀納八荒此時天籟寂虛白自生光

登南山蘭若

開基臨絕頂居與鹿為羣一逕落紅葉萬山生白雲石  
梁秋蘚合茶竈午泉分此地多苓朮長應侶隱君

題紫雲山居

二首

樹老秋仍露山空晚更蟬雨添春藥水雲溼種瓜田對  
榻僧長坐聞鐘客未眠自應麋鹿性疎散愛林泉  
伏日不知暑泉流山四圍竹風渾却扇松雨欲添衣逸  
老為家好逃喧過客稀虛亭無戶牖冉冉白雲歸

題朱澤民畫山水

與客浮湘水琴書共一舟雲間雙樹曉天外數峰秋指  
顧銷塵慮棲遲發櫂謳未知身是畫明月滿滄洲

麻姑山



絕谷寒聲淺陰堂翠色交  
搨書摩蘚石炊黍拾煙梢  
瀑落投龍洞雲歸養鶴巢  
未能招我隱何用解人嘲

東陽道中

出谷蒼煙薄穿林白日斜  
岼崩迂客路木落見人家  
野碓喧春水山橋枕淺沙  
前村烏桕熟疑是早梅花

寄雷隱上人

最憶高人住翠微萬岳千岫雪消時  
林階月在行香早  
石屋雲多出定遲  
棲樹有僧留聽法看泉無客和題詩

松關不鎖容相扣定覓春山食紫芝

春日郊行

青郊冉冉散晴暉芳樹頻聞一鳥啼  
山驛水流花落盡石田雲暖麥抽齊  
禪房鑿路當畝半釣屋維舟近竹西  
行過野橋人語近尋源應到武陵溪

題秋江把釣圖

獨載輕舸過碧川一輪牽動楚江天  
蘆邊有月還吹笛柳外無風不繫船  
留火夜然湘竹岸得魚朝送酒家錢

十年湖海真如畫亦欲狂歌一扣舷

舟過石門梁安峽

書畫船頭載酒迴滄洲斜日隔風埃一雙白鳥背人去  
無數青山似馬來天際雨帆梁峽出水心雲寺石門開  
同遊有客如高李授簡惟慚賦峴臺

送憲幕陳時中分題得平章河

海國猶傳利澤功滄溟縹緲百蠻通潮來估客船歸市  
月上人家水浸空析木星辰三島外搏桑宮殿五雲東

河梁此日重攜手目送靈槎萬里風

金原先壟之側得湧泉甘潔

山下流泉冷沁水漂荒開甃貯甘澄穴通海眼魚龍沸  
波溢田膏雨霧蒸茶鼎夜寒分石乳藥鑱春暖洗雲層  
尋幽有約煙霞伴萬壑千巖擬共登

章素嶺

三華西上章素嶺鳥道凌空最阻脩從龍雲氣皆在下  
旋蟻天文如上浮花竹一家巢絕頂煙塵九點認齊州

欲尋王子營丹處玉宇高寒不可留

題定武蘭亭

繭紙香隨玉匣遺寶書天上世難知  
狼烽幾墮昆明劫蟬翼猶傳定武碑  
曉雨苔花侵搗石秋山柿葉費臨池  
東都已往誰能繼神物終煩謹護持

三山九日示鐵克剛

九日南州尚滯留高風寒雁獨登樓  
自憐白髮難為客欲買黃花只負秋  
南國美人鸚鵡賦北庭公子驕驕裘

不愁大地風霜苦更擬吹笙過十洲

鼓山靈源洞

劣削峰頭萬丈梯上方高與白雲齊青山盡處海門濶  
紅日上來天宇低喝水無人空宴坐摩厓有客謾留題  
飄然欲御長風去一笑何煩過虎溪

乙亥閏十二月重改仍至元

玉殿垂衣儷典墳喬雲承澤浹乾坤歸餘不數秦終閏  
紀厯重瞻漢後元萬里耕桑環海域一溪漁釣老煙村

願聞龔魯為州邑亦欲承風造美門

秋風

秋風淅淅生庭柯蕭蕭木落洞庭波紅樹夕陽蟬噪急  
白蘋秋水雁來多王孫不歸怨芳草山鬼欲啼牽女蘿  
蒹葭蒼蒼白露下望美人兮將奈何

錢塘

雨過高風發屋聲吳中暑退即寒生晴光入眼園林薄  
夜氣侵人枕簟輕寺鐸呼風宵自語鄰機織月曉猶鳴

江湖處處悲秋客  
起束歸裝不待明

贈葉山人

仙巖溪上葉山人  
手佩青囊太古文  
北極地從林邑下  
南條山到蜀江分  
尋源屢識蛟龍宅  
探穴長隨虎豹羣  
更約秋風清霽日  
與君高踏萬重雲

贈曾鍊師

聞說玄都曾鍊師  
曾從海上識安期  
遊山採藥辭家早  
掃石看雲出洞遲  
醺罷每棲雙鶴樹  
丹成時浴九龍池



長年別有壺中樂消得仙人幾局碁

送伍元如赴烏蒙右文教授

西去烏蒙幾驛程平生江海壯遊輕  
牂牁水入蠻雲暖越雋山連楚樹晴  
已載國書通累譯更推王道淑諸生  
他年聽說殊方事綠鬢相看畫錦榮

用鷺峰師韻送澗泉上人遊三首

天台上綵虹橋山下桃花帶露飄  
仙客雲霞迷舊路化人宮殿現層霄  
穿林夜氣香為葢冠嶺晨光錦作標

若到上方應駐錫遙聞法鼓動春潮

右天台

潮音海洞石盤陀送子東遊奈別何日上扶桑天不遠  
雲連析木地無多水王獻寶開丹穴星使通槎泛白波  
見說蓬萊清淺處便從鵬翼起秋河

右盤陀

去禮文殊寶刹開倚空巒岫鬱崔嵬金函奉旨傳香至  
白氈圖形載法來心鏡象縣天外月教筵獅吼地中雷  
還將拂子閒拈起更上繡經第一臺

右五臺

谷口

谷口橋邊日未斜  
先尋宿處近梅花  
分明聽得吹長笛  
祇隔紅欄第一家

南田夜雨

四簷春雨夜浪浪  
記得吹笙近竹房  
三十五年江海夢  
又隨歸雁過瀟湘

樵陽雜詠

二首

歌權曾窮九曲源  
精廬迢遞隱屏前  
閒尋五曲樵谿上  
三十六峰秋滿船

羽客丹成去此臺猶聞笙鶴夜歸來幾回欲問臺邊月  
晴雪梅花冷自開

吳景奎

宇文可發之蘭溪人其姿雄逸其識通明好學苦  
吟于前輩大家詩格無不摹擬當其得意往往似  
之金華宋景濂為序葯房樵唱所  
言如此子名履亦能詩有父風

喻鳩

東村五畝園荒穢久不治荷鋤種豆苗愛此膏土肥森  
然已甲拆保之若嬰兒羣鳩競拂羽俛啄思無遺傍麾

雖稍却投間復在茲一啄不汝惜再啄苗已稀  
剗我心  
上肉充汝腸中飢汝飢誠可憐繒繒那忍施桑林正沃  
若桑椹方垂垂椹熟可醉飽林深無危機恩怨從茲釋  
斯園勿重窺鳩鳴對以臆羣然亦高飛

采菊

爽氣浮西山風煙澹原隰悠然出衡門佳節逢九日衆  
草萎以青黃菊正秋色采之不盈把妙意良自得謂能  
制頽齡可泛忘憂物驩言命壺觴萬事付酣適永懷東

籬人俛仰已陳迹

四時詞

青皇宮中花鳥使  
沓翠霏紅教鶯語移春檻  
小度芳華金犢車輕載歌舞  
曲房夢斷章臺月東風不解  
丁香結鑰魚夜守蒼琅根  
海棠飛落臙脂雪

輕紅流煙香雨足  
新槐影轉勾欄曲  
水晶簾箔度熏風黃吻鳥  
衣語華屋掠簷墮髮初破  
睡粉痕淺護脩蛾綠並禽  
不受雕籠宿背人飛向荷  
陰浴

鳳皇枝頭一葉飛，碧疏朱紱生涼颼。  
素紈團團恩愛衰，含宮嚼羽吹參差。  
瑤階露華霑履綦，星橋月帳愁別離。  
粉筵歡笑占蛛絲。

八姨手折搏樹枝，海天凍合青玻璃。  
瓊樓仙人喚滕六，夜入銀潢剪瑛球。  
沈香火煖錦承塵，回羅羔酒生春粼。  
宮溝不寄題紅怨，日映五紋添弱線。

旅夜 二首

逆旅頻看鏡，秋來白髮生。  
孤雲渺何許，遊子獨關情。  
野

迥雞三唱霜寒雁一聲此時愁絕處歸夢度江城  
秋宵不成寐缺月向人斜更漏傳三鼓寒燈落一花窮  
愁長伴客幽夢只還家烽火何時息吾生未有涯

風雨赤城旅夜書懷

吾兒為客在黃山我向丹丘歲又闌千里鄉關家信遠  
一燈風雨客氈寒衣鈎石角難行路船趁潮頭易上灘  
須信故園歸去好梅花相伴竹平安

桐灘月夜舟中聞琵琶



湛湛長江上有楓予懷渺渺水雲空未誇湓浦逢商婦  
賸喜桐灘有釣翁敲枕醉眠秋渚月挂帆爭趁夜潮風  
曉寒難結思歸夢一尺清霜壓短篷

寓錢塘寄呈元禮叔父

遊子辭家負薜蘿故園春物近如何他山杜宇客懷惡  
清夜竹林歸夢多荃蕙化茅成楚怨牛衣扣角起商歌  
遙知病後無情思莫遣愁添兩鬢皤

和韻春日

二首

雨香雲淡燕泥融  
珂馬如行罨畫中  
江上數峰浮暖翠  
日邊繁杏倚春紅  
鶯花世界惟消酒  
水榭簾櫳易受風  
陌上遊人皆倒載  
寧須拍手笑山公

遊絲舞蝶共徘徊  
野馬空濛拂面來  
風雨偶然成晚霽  
園林何處不花開  
江橫羅帶銀鷗起  
雲想衣裳玉女裁  
賸喜麻姑能送酒  
只愁門外索空壘

姑蘇臺

烏喙難忘石室囚  
苧蘿西子入長洲  
鴟夷若裏姦臣去

麋鹿安能此地遊  
落月當門縣目恨  
遠山顚黛捧心愁  
後人俛仰悲陳迹  
獨倚欄干對虎丘

葺山中故廬有感

溪上先人有敝廬  
昔年經始最勤劬  
弟兄已作辭家燕  
林木誰瞻愛屋烏  
牆角蓬蒿迷町疇  
檐牙風雨老枝梧  
百年堂構真吾事  
未讓揚雄宅一區

紫巖寺

古木迴巖障綠陰  
此中知有小叢林  
縣崖置屋依空曲

繞澗穿雲入窈深  
蒼蘊香來清鼻觀  
蓮花色淨悟禪心  
寶坊亦有差徭及  
從此應無布地金

次韻過表忠觀

龍鳳山前一逕長  
錢王宰木鬱蒼蒼  
英雄何用作疑塚  
富貴不如歸故鄉  
錦繡湖山猶髣髴  
麒麟荆棘已荒涼  
表忠觀裏豐碑在  
異代文章尚耿光

嚴士貞

崇陽人字正卿別號寄菴生平貫穿經史旁通仙釋之書其于詩能自暢所欲言痛懲蹈襲之陋所

著桃溪百詠當  
時爭傳誦之

### 香霧亭

香霧遺基尚宛然  
春來惟見草芊芊  
一庭花影留禽語  
半畝松陰借鶴眠  
鬱鬱新篁呈曉露  
依依高柳拂晴煙  
尋芳誰記前朝事  
謾想風光似昔年

### 遺文堂

支筇訪古入祇園  
靜看先賢筆法玄  
迅若怒猊馳抉石  
雄如老驥渴奔泉  
山藏宿雨蒼碑潤  
僧打遺文妙墨鮮

文字性空忘結習却來重了住山緣

劈箭橋

山際飛梁似跨鼇  
漚麻池湧帶奔濤  
林間虎嘯風初起  
洞口猿啼月正高  
未把機鋒酬劈箭  
閒拈落葉泛輕舸  
朝來獨向溪頭立  
添得桃花浪半篙

羅漢巖

谷邃山深雲作堆  
水源窮處梵宮開  
隈巖石藏何年轉  
飛錫高僧近日回  
翠竹黃花皆佛事  
斷橋流水小天台

超然步出松關外塵世紛紛付劫灰

白羊洞

絕頂高寒境界幽倚筇舒嘯豁吟眸遶林筍蕨香初動  
夾道松杉翠欲流赤豹啼時山月曉白羊眠處洞雲秋  
鄉民歲乞靈泉水一滴天瓢徧九州

廣仁院

幾度尋幽到此山城根清溜響潺潺僧遊南岳經年別  
門對西溪盡日間水氣引涼生竹榻禽棲帶暝入松關

要知自性元無二何用楞嚴辯八還

棲真院

梵音杳杳隔溪聞金刹晴嵐午未分荒蘚沿階留淺暈  
殘花墜水起圓紋蒼鯨吼破千山月白鳥衝開半嶺雲  
却羨老僧忘世慮結趺相對倚爐熏

寶林院

斷香浮月暮鐘微石徑生苔屐齒稀犬吠白雲知客至  
猿升青嶂翫僧歸空山振錫金環響深夜譚禪玉麈揮



一自心心相繼後宗門誰更說傳衣

廣德觀

瑤臺瓊館古朱砂知是神仙第一家不向山中餐柏實  
却來溪上看桃花玉壺春暖融丹液金鼎朝寒護碧霞  
須待三千功行滿御風同駕五雲車

望僊觀

樓閣崢嶸接斷阡旌陽曾歷舊山川飛神謁帝三清所  
拔宅凌空八百年夜醉人皆迷炭婦晝眠余獨愛茶仙

脩然獨倚闌干久如在西山煙雨邊

朱名世

字晞顏吳人出身武胄而喜言詩嘗泛海作鯨背吟俱七言絕句專紀大海風景每首之末綴以成言蓋滑稽也

東洋

東溟雲氣接蓬萊徐福樓船此際開應是秦皇望消息  
采芝何處未歸來

乳島

遠望渾如兩乳同  
近前方信兩高峰  
端知不似雞頭肉  
莫遣三郎解抹胸

沙門島

積沙成島浸蒼空  
古祀龍妃石崦東  
亦有遊人記曾到  
去年今日此門中

萊州洋

萊州洋內浪頻高  
砥鐵千尋繫不牢  
傳與海神休恣意  
二三升水作波濤

尋鯨

萬艦同鯨在海心一時相雜不知音夜來欲問平安信  
明月蘆花何處尋

落蓬

潮信蓬留風力慳落蓬少歇浪中間殷勤為向梢人道  
又得浮生半日閒

遼陽

遼陽別是个乾坤東望瀾漫遠浪奔問道錦州何處是

牧童遙指杏花村

分鰲

高句遼陽各問津  
半洋分路可傷神  
風帆相別東西去  
君向瀟湘我向秦

宋元詩會卷八十八